

En BLOQUE,  
**PODEMOS!**

En Galiza, hai alternativa



Para conseguir traballo, democracia e

# soberanía

## *Galiza precisa*



O aforro galego ao servizo de Galiza cunha  
**Banca Pública**



Investir e xestionar o que se recada aquí con  
**Outro modelo de Financiamento**



Que pague máis quen máis ten, cunha  
**Reforma Fiscal**



Uns servizos universais, con  
**Ensino e Sanidade Pública**

## ASÍ NON SAÍMOS DA CRISE

O “programa de reformas” do PP son as políticas neoliberais da Unión Europea que levan fracasando máis de 3 anos. Son as políticas económicas pactadas na anterior lexislatura por PSOE e PP (reforma sistema financeiro, reforma fiscal, reforma constitución, aceptación da política de recortes sociais, ...) e que contaron coa oposición clara do BNG. Non reactivan a economía, non crean emprego e rouban á sociedade os dereitos laborais e sociais conquistados historicamente.

Por iso o **BNG defende a democracia**, os intereses da maioría da sociedade, non os intereses dos mercados. Por iso o **BNG defende a soberanía**, para que as decisións se adapten ás distintas realidades económicas e sociais.

## QUE FIXO A XUNTA EN 3 ANOS?

Temos o **peor goberno** e o peor presidente da historia de Galiza. Quen ía solucionar a crise en 45 días, deixa a **Galiza peor que hai 3 anos con 277.000 parados e paradas**. Desde que goberna Feijoo o paro aumentou un 31,4 % en Galiza (24 % no Estado). **1 de cada 3 mozos/as menores de 24 anos está en paro**. Medra a desprotección social, cae a produción industrial e deterioráanse todos os sectores económicos: sector naval, explotacións agrogandeiras, turismo, etc. **A débeda de Galiza duplicouse**.

**A autopropaganda de “bos xestores” non se corresponde cos feitos**. O obxectivo da Xunta foi que o PP chegase ao goberno español, e agora que Rajoy non teña problemas, aínda que perxudique a Galiza.



## OS ORZAMENTOS DA FRAUDE

Os Orzamentos Xerais do Estado para 2012 traen:

- **Máis inxustiza social:** o gasto social cae en 8.000 millóns.

Os límites ás Comunidades Autónomas traerán recortes en ensino e sanidade. Recortan o gasto público en 17.000 millóns de euros.

- **Máis crise económica:** os maiores recortes son na promoción económica, nas políticas sociais e de emprego. Preven 630.000 persoas máis en paro no Estado. Galiza superará os 300 mil desempregados/as a finais de 2012. Non son uns orzamentos orientados ao investimento produtivo e á aposta pola innovación.

- **Unha fraude con Galiza:** o investimento real dos ministerios cae 250 millóns de euros, o 38'6 % menos. Para compensar, o goberno español infla a partida do AVE cunha cantidade imposible de executar en 6 meses (por falta de transferencias a un ADIF moi endebedado e polo estado actual dos proxectos) e non imputábel integramente a Galiza (tramo Ourense-Olmedo-Zamora).

## UN RECORTE DE 10.000 MILLÓNS EN SANIDADE E EDUCACIÓN

O PP puxo en marcha un novo recorte de 10.000 millóns de euros en sanidade e educación, a mesma cantidade que se lle entrega a Bankia. **Será peor a calidade destes servizos públicos e aumentarán as desigualdades sociais.** É un ataque ás competencias autonómicas que Feijoo non defende.

**Introducirá o repago sanitario, comezando polo farmacéutico. O BNG defende uns servizos públicos universais e gratuítos, xa financiados cos nosos impostos.** É nos impostos, e non nos servizos básicos, onde ten que pagar máis quen máis ten.

**En Galiza o PP recorta 2 veces.** A Xunta xa recortou 237 millóns de euros en sanidade, e 201 en educación.





## O BNG TEN ALTERNATIVAS

O BNG defende propostas concretas e factíbeis fronte ás actuais políticas regresivas, apostando por instrumentos económicos e financeiros para garantir a soberanía, a activación económica e os servizos públicos e sociais:

**Unha banca pública galega:** ademais dunha reforma do sistema financeiro que regule unha banca privada beneficiaria de fondos públicos e con inxentes beneficios en plena crise, o BNG defende a creación dunha banca pública galega, existente noutros países, para que o aforro galego estea ao servizo da economía produtiva, da inversión pública e da cidadanía. Para isto propoñemos unha fórmula concreta e factíbel adquirindo desde a Xunta de Galiza os fondos públicos do FROB destinados a NGBanco.

**Un novo modelo de financiamento autonómico:** Galiza ten a responsabilidade de subministrar servizos básicos para a cidadanía, como a sanidade ou a educación. Por iso, o BNG avoga porque Galiza exerza de verdade a súa soberanía fiscal, que implicaría a territorialización dos tributos e capacidade normativa e de xestión sobre os mesmos, contando cunha Axencia Tributaria Galega.

**A reforma fiscal progresiva:** o BNG xa propuxo unha alternativa de política fiscal que permitiría recadar 32.000 millóns máis ao ano (gravames máis altos para rendas superiores a 100.000 euros, gravames progresivos nas rendas de capital, imposto sobre grandes fortunas, revisar as deducións do Imposto de Sociedades para grandes empresas, actuación contra a fraude fiscal).

### **Tamén existen alternativas ás actuais políticas de redución do gasto:**

A redución de gasto burocrático improductivo: redución drástica do gasto militar e da Casa real; abandonar as operacións militares no exterior (1 millón de euros ao día en Afganistán), a supresión das deputacións provinciais (6.700 millóns no Estado e 477 en Galiza), a supresión da estrutura periférica do Estado e da central con competencias transferidas; a revisión do financiamento e exencións fiscais da Igrexa católica.

